

Minister di Husticia mr. Andin Bikker

E ley pa aumenta castigo p'esnan cu comete crimen di abuso di menor ta cla pa bay Raad van Advies

FOR di tempo cu Minister Andin Bikker tabata den Parlamento, e por corda cu na 2010 a institui un comision special cu e tabata forma parti di dje pa atende cu e problematica di abuso di menor. Segun Minister Bikker, e tempo ey a introduci un ley riba iniciativa di fraccion di MEP pa introduci castigo minimo.

Na 2015, 2016 tabatin diferente manifesto cu a keda entrega na Parlamento y un otro comision e tempo ey a entrega un raport caminda a constata cu no solamente na 2010 e problematica aki tabata existi caba, pero na 2013 bin riba e cantidad di denuncia a aumenta drasticamente.

Den acuerdo di gobernacion di Gabinete Wever-Croes, a haci compromiso cu Aruba unda ta bay dedica atencion specifico riba e tematico aki. Segun Minister Bikker, e Gobierno aki a tuma e reto aki hopi na serio y ta cumpliendo cu esaki y por mira cu prome di juni, Buro Sostenemi a bira e punto central pa Meld Code p'e melding nan.

Los di esey a haci compromiso cu lo bay haci cambionan den ley drastico cu ta trata e.o. castigo.

Lo bay aumenta e castigo maximo drastico p'e tipo di e crimennan contra menor. Minister Andin Bikker ta splica cu e hecho castigabel no ta bay caduca mas.

P.e. si un persona despues di 20 aña tin e curashi di enfrenta e hecho cu un hende hopi cerca di dje a falta respet pe ora e tabata menor di edad y e bin dilanti ainda e crimen ey no a caduca.

Un di tres aspecto cu Minister Bikker a trece dilanti t'e conseho di Centrale Raad voor Reclassering cu ta duna conseho ora di laga personanan den libertad condicional. Loke Minister Bikker a ripara den e ley, cu esaki t'asina estricto cu si Centrale Raad voor Reclassering bisa cu un persona mester ser laga den libertad, como Minister e no tin e poder pa bisa cu no ta laga e persona bay.



Minister Bikker ta haya cu si e tipo di crimen ta hopi serio, semper e persona cu ta politico responsabel mester por bisa cu e tin otro opinion pa laga e persona keda deteni y sinta su castigo te maximo.

Un otro ley cu ya caba ta hopi leu, t'e werkboek nobo van strafvordering. Den esey ta introduci e.o. e derecho di e victima y tambe hende hopi cerca p.e. un representante legal.

Momento cu trata un caso penal contra persona cu a comete un crimen, sea e ta un victima of su representante legal na final di e tratamiento prome cu Huez tuma decision e tin derecho di hiba palabra.

Segun Minister Bikker, e ta haya ta hopi importante pa proteccion y derecho di e victima y e persona rond di dje cu ta sufrí di un crimen por hiba palabra. Huez por tuma den consideracion ki tipo di castigo pa impone y por tene na consideracion ki impacto e crimen tabatin riba e victima y su medio ambiente.

E ley den su proceso ta bay Raad van Advies y ora e bin bek e ta bay Parlamento y Minister ta spera cu pa september, october e por drenta na vigor.